



Šemsudin Mehmedović

Broj: 01- 428 /25

Sarajevo: 1.4.2025.godine

PREDSTAVNIČKI DOM

PARLAMENTARNE SKUPŠTINE BOSNE I HERCEGOVINE

n/r predsjedavajućeg

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 01-04-2025			
Ime i prezime jedinica	Klasifikaciona oznaka	Redni broj	Broj priloga
01-	50-1-	526/25	

U skladu s čl. 170. i 171. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 53/22, 59/23, 87/23 i 50/24) postavljam sljedeće

**DOPUNSKO ZASTUPNIČKO PITANJE ZA
SEKRETARIJAT PARLAMENTARNE SKUPŠTINE
BOSNE I HERCEGOVINE**

Odgovori Kolegija Sekretarijata Parlamentarne skupštine Bosne i Hercegovine (u daljnjem tekstu: Kolegij Sekretarijata) na poslanička pitanja prijete da potpuno degradiraju institut poslaničkog pitanja, a posebno odgovor broj 01-50-1-526-2/25 od 20. 3.2025.

Argumentirat ću u nastavku:

1. Naknadnom provjerom odgovora kojim sam tražio da mi se dostavi Pravilnik o izmjenama i dopunama Pravilnika o unutrašnjoj organizaciji i sistematizaciji radnih mjesta u Sekretarijatu Parlamentarne skupštine Bosne i Hercegovine ustanovio sam da je Odjel za lektoriranje još 26. februara 2025. vratio predlagачu navedeni akt. **Stoga ponovo tražim dostavljanje teksta Pravilnika na koji je Zajednička komisija za administrativne poslove dala saglasnost na 12. sjednici, 12.2. 2025.**
2. S obzirom na to da niste odgovorili na moje precizno i jasno pitanje o tome zašto se u tajnosti vodio cijeli proces izmjene sistematizacije, ponavljam pitanje i molim da mi konkretno odgovorite: **“Zašto u izradu Pravilnika o izmjeni i dopuni sistematizacije nisu bili uključeni svi sekretari komisija, rukovodioci sektora i šefovi odjela kao i Sindikat koji je i pismeno tražio da bude uključen u ovaj proces?”**
Budući da ste u odgovoru naveli da je Kolegij Sekretarijata smatrao "potrebno da se određene organizacione jedinice kapacitiraju uslijed opterećenosti dijela ljudskih potencijala", **molim da precizirate te organizacione jedinice i taksativno, s konkretnim parametrima nabrojite radna mjesta koja su imala povećan obim posla.**
3. Na moje traženje da precizno navedete podatke koji opravdavaju potrebu za svako novo radno mjesto, vi ste nabrojali nekoliko organizacionih jedinica u kojima je "povećana usloženost u pogledu povećanog obima posla", za koje sam naknadnom provjerom utvrdio sljedeće:

- Novim pravilnikom predviđeno je da u Odjelu za pripremu sjednica Predstavničkog doma radi pet službenika: šef Odjela, čak tri savjetnika za pripremu sjednica i viši stručni saradnik za pripremu sjednica Predstavničkog doma, iako je Predstavnički dom u 2024. godini imao svega 10 redovnih i 4 hitne sjednice.
- Novim pravilnikom uspostavlja se Odjel za koordinaciju zajedničkih aktivnosti i strateško planiranje kojem se u opisu poslova navodi da organizira i priprema zajedničke sjednice oba doma Parlamentarne skupštine BiH, dnevne redove, pozive, te zapisnike i izvještaje sa zajedničkih sjednica domova, iako, suprotno poslovnici, od početka aktuelnog saziva nije održana NIJEDNA zajednička sjednica oba doma Parlamentarne skupštine Bosne i Hercegovine. Planirano je da Odjel ima šefa i stručnog savjetnika.
- U kabinetu sekretara Zajedničke službe uvode se čak dva nova radna mjesta stručnih savjetnika u čijem opisu poslova se navodi da **pomažu pomoćniku sekretara** u obavljanju dužnosti pomoćnika sekretara, koji **pomaže** sekretaru Zajedničke službe.
- Uz brojne nelogičnosti, u Sektoru za finansije uspostavlja se Odjel za javne nabavke s dva nova radna mjesta, dok postojeće pozicije koje su vezane za poslove javnih nabavki ostaju izvan tog odjela.
- U odgovoru ste naveli da je, između ostalih, i u Sektoru za međunarodne odnose i protokol povećan obim poslova ali se kao uslov za stručnog saradnika navodi završen fakultet tehničkog ili prirodoslovnog smjera, što je sasvim nejasno ako znamo prirodu poslova ovog sektora.

Zato ponovo tražim da mi precizno navedete podatke koji opravdavaju potrebu za svako novo radno mjesto.

4. U odgovoru na ovo pitanje naveli ste da bi iznos bruto plata na godišnjem nivou za nove pozicije bio oko 350.000 KM. **Da li je ovo izdvajanje opravdano ako znamo da po svim parametrima nije došlo do povećanja obima poslova u Sekretarijatu i ako imamo u vidu aktuelne socio-ekonomske prilike u državi?**
5. Molim da mi odgovorite na pitanje: **koji su rukovodioci i državni službenici po nalogu Kolegija Sekretarijata radili na izradi Pravilnika i da li im je dodijeljena novčana naknada za rad na izradi Pravilnika?**
6. Što se tiče pozicije sekretara Komisije za vanjske poslove Predstavničkog doma, ona nije, kako je netačno navedeno u odgovoru, trenutno upražnjena nego je upražnjena od 2021. godine. Kako kažete, Komisija je "kapacitirana sa dva stručna savjetnika" te da niste smatrali "najnužnijim popunjavanje ove pozicije jer su se pojavili prioriteti u drugim organizacionim jedinicama".


S obzirom na to da sam u prethodnim komentarima vaših odgovora pokazao da nijedna od pozicija koje se popunjavaju ovim pravilnikom nije prioritetna, odgovor sigurno leži u nekim drugim činjenicama. **Uz to, ako Parlamentarnoj skupštini BiH nije potrebno da Komisija za vanjske poslove, u ovako složenim vanjskopolitičkim prilikama, ima sekretara, onda se sljedeće pitanje samo po sebi postavlja: "Ako komisije mogu voditi stručni savjetnici, onda sekretari komisija uopšte nisu potrebni?"**

U skladu s članom 171. st. (2) Poslovnika Predstavničkog doma odgovor u pisanoj formi mora se dostaviti u **roku od 30 dana** od dana kada je pitanje dostavljeno onome kome je upućeno.

Članom 6. Zakona o parlamentarnom nadzoru propisano je da zastupnici provode nadzor nad radom institucija Bosne i Hercegovine postavljanjem zastupničkih pitanja, a članom 7. stav 2. istog zakona, utvrđeno je da se parlamentarni nadzor provodi radi preventivne zaštite od zloupotrebe položaja i ovlaštenja, materijalnih i finansijskih resursa.

S poštovanjem,

ZASTUPNIK PS BiH
Šemsudin Mehmedović

A handwritten signature in black ink, consisting of a series of connected loops and a long horizontal stroke at the end, positioned to the right of the printed name.

